

ԱՐՈՒՃԻ ՎԱՂ ՄԻՋՆԱԴԱՐՅԱՆ ՀՈՒՇԱՐՁԱՆՆԵՐԸ

Բ. Լ. ՍԱԴՈՅԱՆ

Պատմական Արագածոտնի Արուճ գյուղաքաղաքի (այժմ Աշտարակի շրջանի Արուճ գյուղ) տարածքը և մերձակայքը բնակեցվել են սկսած մ. թ. ա. III հազարամյակից: Բնակությունն այստեղ հարատևել է նաև ուրարտական և անտիկ ժամանակաշրջաններում: Սակայն այս տարածքում առավել հաճախ հանդիպում են IV—XVII դդ. վերաբերող պաշտամունքային, մեմորիալ, աշխարհիկ և պաշտպանական կիրառության հուշարձաններ: Միջնադարյան հուշարձանների առատությունը ուղեկցվում է բազմաթիվ գրավոր և վիմագիր հիշատակություններով, հնարավորություն ընձեռելով պարզել Արուճի պատմական զարգացման փուլերը:

Արուճի մասին հայ մատենագրության մեջ վաղագույն տեղեկությունը հաղորդում է Եղիշեն: Վասակ Սյունու և նրա կողմնակիցների կողմից 451 թ. ավերած արքունի ձմեռոց-դորակայանների թվում պատմիչը հիշատակում է նաև Արուճը: Եղիշեն գրում է. Վասակը «յետս կացեալ յուխտէն քրիստոնէութեան և աւերեալ զբազում տեղիս Հայոց աշխարհին, մանաւանդ զձմերոցս արքունի, որ կայանք զօրացն էին, զԳառնին և զԵրամանս և զԴրասխանտ-կերտն՝ զմեծ դաստակերտն, զՎարդանաշատն և զամուրն Օշական. զՓառախոտն, զՍարղեանսն, զՁողակերտն աւան և զբերդն Արմաւրի. զԿոշն աւան, զԱրուճն, զԱշնակ և զամենայն գեղս և զաւանս, որ շուրջ զնովաւ էին, առեալ, աւերեալ եւ հրձիգ արարեալ...»:

Արագածոտն գավառը պատկանել է Արշակունիներին² և ըստ Եղիշեի ու Փավստոս Բուզանդի տեղեկությունների արքունի զորքերի կենտրոնացման վայր էր³: Եղիշեի հիշատակած արքունի զորակայան-ձմեռանոցները պետք է որ կառուցված լինեն Արշակունի արքաների կողմից III—IV դդ. կամ էլ օգտագործված լինեն ավելի վաղ շրջանից պահված պաշտպանական կառույցները (ինչպես՝ զբերդն Արմաւրի): Զորակայան լինելուց բացի, վերը նշված ամրոցներից առնվազն չորսը (Օշական, Կոշ, Արուճ, Աշնակ) պաշտպանում էին դեպի Սև ծովի ափը տանող հնագույն ճանապարհը⁵, իսկ Փառախոտն ու Ձողակերտը (Տողակերտ), ըստ Պեղտինգերյան քարտեզի, Արտաշատ—Սատաղ ճանապարհի կայաններից էին⁶:

1 Եղիշեի Վասն Վարդանայ և Հայոց պատերազմին. Երևան, 1957, էջ 78—79:

2 Ս. Երեմյան. Հայաստանն ըստ «Աշխարհացոյց»-ի. Երևան, 1963, էջ 38: Հատկանշական է, որ Արագածոտնում իրավունք ունեին բնակվելու միայն արքան, գահաժառանգը և արքայահայրը (ինչպես Տիրան արքայահայրը՝ Կուաշ, Կոշ ավանում). Մովսէս Խորենացիի. Հայոց պատմություն. Երևան, 1981, էջ 260:

3 Եղիշե, էջ 79: Փավստոս Բուզանդ. Հայոց պատմություն. Երևան, 1947, էջ 95—97:

4 Եղիշեի հիշատակածներից Կոշը, Օշականը և Գառնին որպես բերդ նշվում են Խորենացու և Փավստոս Բուզանդի կողմից IV դարի դեպքերի հետ կապված. տե՛ս Խորենացի, էջ 260: Բուզանդ, էջ 95—97:

5 Ս. Երեմյան. Մեծ Հայքի թագավորությունը 4-րդ դարում, ուսումնական քարտեզ. Երևան, 1979:

6 Հ. Մանանդյան. Հին Հայաստանի գլխավոր ճանապարհներն ըստ Պեղտինգերյան քարտեզի. Երևան, 1936:

Ըստ միջնադարյան «Զորանամակի», արքունիքի անմիջական իրավասության տակ էր գտնվում մոտ 20 հազարանոց մի զորաբանակ⁷, որի մի մասը պահվում էր արքունի ամրոցներում՝ որպես կայազոր, իսկ մյուս մասը՝ զորակայաններում։ Արքունական այդ զորքը ենթակա էր սպարապետին։ Եղիշին և Փարպեցու տեղեկություններից երևում է, որ մարզպանական շրջանում ևս հիշյալ ամրոցները մշտական և սպարապետին ենթակա կայազոր են ունեցել, որոնց շեղորացումը, Վասակ Սյունու ծրագրով, անհրաժեշտ էր։ Սակայն այս մասին ավելի հավանական է թվում Ղաղար Փարպեցու տեղեկությունը⁸, ըստ որի, Վասակը ոչ թե ավերել ու հրդեհի ճարակ է դարձրել վերը նշված զորակայանները (ինչը մեծ զորական ուժ ու անխուսափելի կորուստներ կպահանջեր), այլ իր իշխանության ուժով փոխել է կալազորը՝ իրեն հավատարիմ զինվորականներ նշանակելով։

Արուճի հուշարձանների ուսումնասիրությունները մինչև օրս տվյալներ էին ափել վերոհիշյալ զորակայանի մասին։ Բացի այդ, Արուճի հուշարձանները ուսումնասիրողները նվաղ ուշադրություն են դարձրել Արուճ գյուղի տարածքում գտնվող ամրաշինական կառույցներին, համարելով, որ դրանք ուշ շրջանում են կառուցված. ինչ վերաբերում է Արուճի VII դարի նշանավոր տաճարին և պալատական կառույցներին, ապա դրանք արդեն դարձել են հատուկ հետազոտության առարկա⁹։ Զգացվում էր նաև Արուճի պաշտպանական կառույցների հետազոտության անհրաժեշտությունը։

1979 թ. կատարված դաշտային հետազոտություններից պարզվեց, որ այս տարածքում պահպանվել են հզոր պարսպի հետքեր։ 1980—81 թթ. պեղումներով¹⁰ բացվեց այս պաշտպանական կառույցի մի հատվածը՝ հնարավորություն տալով որոշակի պատկերացում կազմել հուշարձանի կառուցման ժամանակի, տեխնիկայի և շերտագրության, նաև պաշտպանական նշանակության մասին։

Հուշարձանը գտնվում է Արուճի եկեղեցուց և պալատական համալիրից մոտ 200 մետր դեպի հարավ-արևմուտք։ Պարսպի արևմտյան հատվածը, որն ուղղությամբ համընկնում է ուշ ժամանակաշրջանի ղյաղկանման կառույցի արևմտյան պատի ուղղությանը¹¹, կառուցված է զանազան ձևերի, իսկ բացված մյուս հատվածը՝ հարավայինը, ուղիղ անկյամբ, այգիների եզրով շարունակվում է ձորակից դեպի արևելք։ Հուշարձանի ամբողջ տարածքը դարասկզբին բնակելի է եղել։ 1960-ական թթ. բնակիչներից շատերն այստեղից տեղափոխվել են, թողնելով կանգուն և կիսավեր բաղմամբիվ շինություն-

7 Н. Адонц. Армения в эпоху Юстиниана. Ереван, 1971, с. 283—284. Տե՛ս նաև Ղևոնդ Ալիշան. Այրարատ. Վենետիկ, 1890, նշված քանակի մեջ չի մտնում Մարզպետական զորքը։

8 Ղաղար Փարպեցի. Հայոց պատմություն. Երևան, 1982, էջ 156։


9 Թ. Բորամանյան. Նյութեր հայկական ճարտարապետության պատմության, հ. 1, Երևան, 1942 և հ. 2, 1948; Միքայել Հովհաննեսյան. Հայաստանի բերդերը. Վենետիկ, 1970, էջ 782—783; Վ. Հարությունյան. VII դ. աշխարհիկ ճարտարապետության մի նոր հուշարձան.—ՀՍՍՀ ԳԱ «Տեղեկագիր» (հաս. գիտ.), 1953, № 8; Նույնի՝ По поводу датировки храма в Аруче. Ереван, 1946; Н. Токарский. Архитектура Армении в IV—XIV вв. Ереван, 1946, с. 38—72; Марио д'Онофрио. Несколько армянских дворцов V—VII вв. (II Международный симпозиум по армянскому искусству). Ереван, 1978.

10 1980—81 թթ. պեղումները Արուճում կատարվել են Երևանի պետական համալսարանի Հայագիտական կենտրոնի հնագիտական արշավախմբի կողմից, տողերիս հեղինակի ղեկավարությամբ։ Պեղումների մասին մանրամասն հաշվետվություն տե՛ս Շամիրամի հնագիտական արշավախմբի 1980, 1981 թթ. միացյալ հաշվետվությունում (ՀՍՍՀ Մինիստրների խորհրդին առընթեր պատմության և կուլտուրայի հուշարձանների պահպանման և օգտագործման վարչության արևիվ)։


11 Այս պատի մեջ, որը հիմնովին վերակառուցվել է 1514 թ., երկու տեղ երևում են վաղագույն պարսպի հատվածներ՝ պահպանված 1-ից 3 շարքի բարձրությամբ։

ներ: Այս կառույցները և տարածքի ներկայիս բնակելի տները մեծապես խանդարեցին պեղումներին և այդ է պատճառը, որ մոտ 250 մետր երկարությամբ ճշտված վաղագույն պարսպից պեղվեց մոտավորապես կեսը (տե՛ս գծ. 1):

Պարսպի հարավային հատվածին զուգահեռ, նրանից 20—25 մետր դեպի հարավ, ձգվում է երկրորդ պարիսպը, հատակագծում կիսակլոր բուրգերով, որոնցից մեկը երևում է բնակելի տան բակում, պահպանված 4 շարքի բարձրությամբ (120—130 սմ): Շարքի քարերի մշակումը, շափերը, շարվածքի



Գծ. 1



Գծ. 2

տեխնիկան և աշտարակի ձևը հիմք են տալիս ենթադրելու, որ արտաքին այս պարիսպը համեմատաբար ուշ ժամանակի կառույց է և կարող է վերաբերել Բագրատունիների Արուճում ծավալված շինարարական գործունեության ժամանակաշրջանին՝ IX—X դդ.:

Վաղագույն պարիսպը շարված է տուֆի բլոկներից, որոնց չորս կողմերը և արտաքին մակերեսը սրբատաշ են, ներսի կողմը՝ չտաշված և ունեն երկայնական եզրակոսներ. այնպես որ պարիսպը թե՛ դրսից և թե՛ ներսից սրբատաշ է, ստորին շարքը պատի երկու կողմից էլ 8—10 սմ առաջ է դրված՝ հիմնախարխիս (ցոկոլ) առաջացնելով, որը տեղ-տեղ հարմարեցված է տեղանքին և 15-ից մինչև 50 սմ փոփոխվող բարձրություն ունի: Շարքի քարերի բարձրությունը 48—50 սմ է, իսկ երկարությունը տատանվում է կես մետրից մինչև 120 սմ-ի սահմաններում: Պարսպի հաստությունը 1,8—2,0 մետր է, որի մոտ կեսը կազմում է երկու կողմից դրված քարերի հաստությունը (մոտ 90 սմ), իսկ մյուս կեսը՝ կրաշաղախ և արտակարգ ամուր լիցքը, տուֆի և որձաքարի անկանոն բեկորներով, լավ շաղկապված քարերի անհարթ մակերեսի հետ:

Պարսպի բացված հատվածից լրիվ կամ կիսով չափ¹² պեղվել է 5 աշտարակ, մեկն էլ գտնվում է բնակելի տան օժանդակ կառույցի պատի մեջ (գծ. 1, 4ա): Աշտարակները քառակուսի են, ներքուստ 4×4 մետր շափերի, բոլոր պատերը հիմնախարխիս վրա են դրված: Հիմք է հանդիսանում տեղ-տեղ հողի լիցքով հարթված ժայռը: Աշտարակի առանցքը դրված է պարսպի ներսի հարթությանը հավասար, դեպի ներս ընկած պատերը ավելի բարակ են, ի հաշիվ լիցքի թանձրության պակասեցման: Աշտարակներից երկուսում (գծ. 1, 1բ և 1գ) ներսից, արևելյան կողմից, մուտք է բացվել:

Պարսպի տարածքում պեղվել է երկու հատված, ընդհանուր առմամբ մոտ 100 մետր երկարությամբ և մոտ 5 մետր լայնությամբ: Պահպանվել է չորս հնագիտական շերտ: Դրանցից վերինը խիստ վնասված է ժամանակակից կառուցապատումով, ընդհանուր առմամբ IX—XIV դդ. թվագրվող միջին երկու շերտը լավ են պահպանված, իսկ ստորին շերտից միայն մի տեղում, արևմտյան պարսպից մոտ 5 մետր դեպի արևելք 1բ և 1գ բուրգերի միջև, բացվեց

¹² Կիսով չափ են պեղվել 1ա (անկյունային) և 2ա բուրգերը (գծ. 1), այստեղ գտնվող ժամանակակից կառույցների պատճառով:

տեղում ջարդված կարասների մի շարք¹³, գորշ, անփայլ մակերեսով, սպիտակ աստառով, մեծահատիկ, բայց լավ մշակված կավից, խիստ բնորոշ զարդապատկերներով՝ իրար գուդահեռ, ուռուցիկ, ուղղահայաց գծագարով գոտիներ իրանի և վզի մասում և դրանց միացնող, նույնատիպ, թեք գոտիներ միջին մասում: Այս տիպի խեցեղեն հայտնի է ուշ անտիկ և վաղ միջնադարյան վերջերս պեղված մի քանի հուշարձաններից, ինչպես Շիրակավանը, Ջրափին, Մաստարայի պաշտպանական համակարգը և Կաթնաղբյուրի ամրոցը¹⁴, որոնք գտնվում են Արագածոտնի և Շիրակի տարածքում:

Պարսպի կառուցվածքը և ճարտարապետական առանձնահատկությունները թույլ են տալիս այն թվագրել վաղ միջնադարով՝ IV—VII դարերով, քանի որ VII դարից հետո այլևս չեն օգտագործվում քարերի հորիզոնական եզրակոսներ, քարերի չափերը փոքրանում են, հատկապես հաստությունը, և եթե դարգացած կամ ուշ միջնադարում պաշտպանական կառույցների պատերը մեծ թանձրություն են ունենում, ապա միայն ի հաշիվ պատի լիցքի հաստության, երբ արտաքին շարվածքը հիմնականում միայն երեսպատման դեր է կատարում: Արուճի պարիսպների կառուցման տեխնիկան, որը գալիս է ուշ անտիկ շինարարական ավանդույթներից¹⁵, վաղ միջնադարյան Հայաստանում լայնորեն կիրառվում է տուֆի առկայության շնորհիվ: Պարսպի վաղ միջնադարյան լինելու ապացույց են նաև քառակուսի աշտարակները՝ շարված իրարից որոշակի հեռավորության վրա (17—18 մ): VII դարից այս կողմ Հայաստանի տարածքի ամրաշինական կառույցներում բուրգերը կառուցվում են կիսակլոր կամ $\frac{3}{4}$ շրջան հատակագծով (Ամբերդ, Բջնի, Ժիզնիս, Մաղասաբերդ, Փոքր Թալին, Կոշ, Արուճի արտաքին պարիսպ և այլն), իսկ վաղ միջնադարյան ամրոցաշինությունից կարելի է նշել երկու օրինակ, երբ աշտարակները քառակուսի են, սրբատաշ քարերով շարված¹⁶, թեև ոչ սնամեջ¹⁷: Դրանք են՝ Զվարթնոցի և Անիի VII դարում կառուցված պարիսպները: Հետագոտվող պարիսպը որոշակիորեն մերձենում է Հոռմեական կայսրության շրջանի ամրոցաշինական ավանդույթներին: Քառակուսի, սնամեջ, կանոնավոր տեղադրված բուրգերով, անկյունային բուրգերի կառուցման ձևով, հատակագծման կանոնավորությամբ և ամփոփվածությամբ այն զարգացումն է հոռմեական «կաստեյում»-ների (տե՛ս գծ. 2), որոնք ղինակայան-ճամբարներ էին և որոնց ձևը ծագում էր լեգեոնների մարտական ճամբարներից¹⁸:

Մնում է սակայն այն հարցը, թե IV—VII դդ. ընթացքում ե՞րբ է կառուցվել այս պարիսպը: Այդ դարերում Արուճում երկու շինարարական շրջան է հայտնի, մեկը՝ գորակայանի կառուցումը Արշակունիների օրոք, մյուսը՝ եկեղեցու և պալատական համալիրի կառուցումը Գրիգոր Մամիկոնյանի կողմից: Խոսելով հայոց իշխանի ծավալած շինարարական գործունեության մասին, Հովհաննես Դրասխանակերտցին վկայում է, որ նորակառույց պալատը և եկե-

¹³ Այս կարասների շարքը մինչև վերջ չպեղվեց, քանի որ այն մտնում էր ծամանակակից տան պատի տակ:

¹⁴ Տե՛ս Հայկական ՍՍՀ-ում 1979—80 թթ. դաշտային հնագիտական աշխատանքների արդյունքներին նվիրված զեկուցման թեզիսներ. Երևան, 1981: Հայկական ՍՍՀ-ում 1981—82 թթ. դաշտային հնագիտական աշխատանքների արդյունքներին նվիրված գիտական նստաշրջանի զեկուցումների թեզիսներ. Երևան, 1983:

¹⁵ В и т р у в и й. Десять книг об архитектуре. М., 1936, с. 51; Всеобщая история архитектуры в XII тт. (ВИА). Т. II, М., 1973, с. 489—490.

¹⁶ Մի շարք ամրոցներում, որոնք ցիկլոպյան (անկրաշաղխ) շարվածք ունեն, սակայն վաղ միջնադարում գոյատևել են որպես ամրոց, աշտարակները նույնպես քառակուսի են (Մաստարայի պաշտպանական համակարգի երեք ամրոցներ, Գառնահովտի ամրոցներ և այլն):

¹⁷ Ըստ Պրոկոպիոս Կեսարացու, Հուստինիանոս կայսեր օրոք առաջին անգամ խախտվեց այդ կարգը և Պետրա (Ցիսիսիսի) քաղաքի մուտքի աշտարակները հոծ կառուցվեցին: Օտար աղբյուրները: Հայաստանի և հայերի մասին մատենաշար. Պրոկոպիոս Կեսարացի. Երևան, 1967, էջ 120:

¹⁸ ВИА, т. II, с. 494, 509.

ղեցին պարսպապատվել են. «Եւ ապա հաստահեղոյս քարամբք և կրով պարսպեալ՝ կարգեալ է տուն բնակութեան իւրոյ»¹⁹: Պալատի շուրջը պարսպի հետքեր չեն հայտնաբերվել, միայն ըստ հնաբնականների տեղեկությունների²⁰ դարասկզբին, համալիրից արևելք, ձորակի եզրին, պահպանված են եղել սլատի մնացորդներ: Չի բացառվում, որ քառակուսի բուրգերով պարիսպը Գրիգոր իշխանի կառուցած պարսպապատի մի հատվածը լինի²¹, սակայն որոշ հանգամանքներ հնարավորություն են տալիս ենթադրելու, որ այս կառույցը Եղիշեի հիշատակած արքունի զորակայան-ձմեռանոցն է՝ կառուցված III—V դդ.: Նախ այն, որ ձորեզրին կառուցված դղյականման շինություն հյուսիս-արևմտյան արտաքին անկյան՝ վաղ միջնադարյան պարսպի ստորին երեք շարքերը հիմնախարիսխ ունեն թե՛ դիմացից և թե՛ հյուսիսային կողմից, ինչը նշան է այս կետում պատի ավարտի կամ բուրգի առկայության: Սակայն նույն պատի մեջ, նույն հարթության վրա պահպանված վաղագույն պարսպի երկու այլ հատվածներ անհավանական են դարձնում այստեղ բուրգի առկայությունը տեղ չլինելու և ժայռի ռելիեֆին հարմարվելու պատճառով: Այս երկրորդ անկյունը ամփոփում է պարիսպը և ենթադրել է տալիս, որ գործ ունենք մոտ 1,5 հեկտար տարածությամբ պաշտպանական կառույցի հետ:

Արուճի պարիսպը իր կառուցվածքով և քարերի չափերով հին է թե՛ Զվարթնոցի և թե՛ Անիի նշված պարիսպներից: Պարսպի վրա ոչ մի տեղ վարպետի նշաններ չեն հայտնաբերվել, մի բան, որը բնորոշ է IV դարին, քանի որ վարպետի նշանները հանդես են գալիս V դարից սկսած և պառտադիր դառնում VI—VII դդ.:

Կառույցի ոչ այնքան անառիկ դիրքը, որ բնորոշ չէ Հայաստանի ամրաշինության մինչ օրս հայտնի օրինակներին, պետք է ինչ-որ կերպ փոխհատուցվեր նախ՝ իր հզոր պաշտպանական համակարգով, կանոնավոր և կուռ կառուցվածքով և ապա՝ մեծաքանակ զորական ուժի առկայությամբ, ինչը ամբողջովին համապատասխանում է արքունի զորքերի զորակայանի դերին ու նշանակությանը:

Կատարված աշխատանքի հսկա ծավալը և կառուցման որակը, VII դարում կառուցված եկեղեցուց և պալատից ունեցած հեռավորությունը գալիս են լրացնելու վերը նշված փաստարկները և հնարավոր են դարձնում ենթադրել, որ պեղումներով հայտնաբերված պարիսպը մասն է Եղիշեի հիշատակած Արշակունյաց զորակայանի, որն առայժմ միակն է Հայաստանի տարածքում ի հայտ եկածներից:

Արուճի մասին մեկ այլ վկայություն է պահպանվել VII դարի սկզբից, Հայոց Աբրահամ Աղբաթանեցի կաթողիկոսի՝ 608 թ. հայ ժողովրդին և հոգևորականությանն ուղղված շրջաբերականում²²: Այս վկայությունը հիմք է տալիս ենթադրելու, որ VI—VII դդ. Արուճի տարածքում եկեղեցի է գոյություն ունեցել՝ կառուցված Արուճի այժմ կանգուն եկեղեցուց առաջ:

1950-ական թթ. սկզբներին, Վ. Մ. Հարությունյանի ղեկավարությամբ կատարված Արուճի համալիրի պեղումների ընթացքում²³, կաթողիկեից մոտ 60 մետր դեպի հարավ-արևելք, բացվել է IV—VI դդ. բնորոշ միանավ մատուռ, որն իր ոճով և կառուցման տեխնիկայով առանձնանում է VII դարով թվագրվող եկեղեցուց և պալատական կառույցներից: Չեղծվել և չափերով նման համաժամանակյա մատուռներ կան նաև այլ վաղ միջնադարյան եկեղեցիներ-

¹⁹ Յովհաննու կաթողիկոսի Գրասխանակերտեցույ Պատմութիւն հայոց. Թիֆլիս, 1913, էջ 91:

²⁰ Վ. Հարությունյան. VII դ. աշխարհիկ ճարտարապետության մի նոր հուշարձան, էջ 58:

²¹ Տալոբ, տարածքի կառուցապատումը և մասամբ բնակելի լինելը առայժմ անհնար է դարձնում պարսպի հետագա պեղումը:

²² Գրիգ. թղթոց. Թիֆլիս, 1901, էջ 151: Հիշատակվում է Արուճի «Վանից երեց» Գրիգորիսը:

²³ Վ. Հարությունյան. VII դ. աշխարհիկ ճարտարապետության մի նոր հուշարձան, էջ 57:

րի՝ Քասաղի բաղիլիկայի, Զվարթնոցի և Թալինի տաճարների կողքին, ժամանակով նախորդելով նրանց և, գուցե, կանխորոշելով վերը նշված եկեղեցիների կառուցումը այդ տեղերում: Չի բացառվում, որ այս մատուռը մասը կազմած լինի Արուճում VI դարի վերջին—VII դարի սկզբին գոյություն ունեցած եկեղեցական համալիրի:

Սերեոսի վկայությամբ, 654 թ. Հայաստանի առաջին արաբ նվաճող Հաբիր իրն-Մասլաման առժամանակ հաստատվում է Արուճում²⁴: Սերեոսը հիշատակում է, որ Հաբիրն այստեղ նահատակեց Արտավազդ Դիմաքսյան իշխանին:

Նույն թվականի վերջին հայոց իշխան է ընտրվում Համազասպ Մամիկոնյանը. ըստ երևույթին, իր կառավարման յոթ տարիների ընթացքում նրա նրստավարը Արուճն էր²⁵: Սակայն սկզբնաղբյուրներում տեղեկություն չի պահպանվել նրա շինարարական որևէ գործունեության մասին: 661 թ. Հայոց իշխանությունը և նստավայր Արուճը ժառանգել է Գրիգոր Մամիկոնյանը (661—685), որն իր երկարատև և համեմատաբար խաղաղ իշխանության տարիներին Արուճը դարձրել է Հայաստանի քաղաքական և հոգևոր կենտրոններից մեկը: Գրիգոր Մամիկոնյանի մեծածավալ շինարարական աշխատանքի մասին առաջինը հիշատակում է այդ ժամանակաշրջանին պատմականորեն ավելի մոտ կանգնած Ղևոնդ պատմագիրը: Նա նշում է Արուճի տաճարի կառուցման մասին, ասելով. «Եվ շինեաց նա տունն աղօթից ի զառն Արագածոտնի ի յաւանն Արուճ, տաճար փառաց անուան տեառն գեղեցիկ վայելչութեամբ...»²⁶: Հովհաննես Դրասխանակերտցին, խոսելով Գրիգոր Մամիկոնյանի գործունեության մասին, հիշատակում է նաև Արուճում կառուցած պալատի մասին: Պատմիչը գրում է. «Զայսու ժամանակաւ բարեպաշտ իշխանն Գրիգոր Մամիկոնեան աստուածային այցելութեամբ հիմնադրեալ զշքնաղագեղ եկեղեցին, որ ի դաստակերտին Արուճ՝ շինէ զնա ստիպով, ևրկնային իմն ճեմարան յարդարալի ի վերայ երկրի: Եւ ի հարաւոյ կողմանէ դնէ զարքունիս իւր յեզր քարածայռ ձորակին, յորում բղխէ ականակիր աղբիւր պղպջակեալ ընդ քարածերպոյ վիմարդ քարացն, որ զեզրս ունի իբրև զպսակ պատուարի»²⁷:

Արուճում հայոց իշխան Գրիգոր Պատրիկ Մամիկոնյանի կատարած կառուցումների մասին հիշատակում են նաև Ասողիկը, Սամվել Անեցին, Մովսես Կաղանկատվացին, Կիրակոս Գանձակեցին և ուրիշները²⁸: Դրանց վկայությունն է նաև Արուճի Կաթողիկե եկեղեցու արևելյան պատին, խորանի կենտրոնական լուսամուտի տակ գետնի վրա շինարարական արձանագրությունը, որով զբաղվել են մի շարք հետազոտողներ:

Հիմքեր կան ենթադրելու, որ Գրիգոր Մամիկոնյանը, ունենալով կենտրոնացված և ուժեղ իշխանություն, միաբան լինելով աշխարհիկ և հոգևոր պետե-

24 Սերեոսի եպիսկոպոսի պատմություն. Երևան, 1939, էջ 152: Սերեոսը գրում է. «...Հաբիրն անուանեալ զարաւարի, որ նստէր յԱրուճ Աշնակի»: Սա մի կողմնակի ակնարկ է մեկ այլ Արուճի գոյության մասին, սակայն որ Սերեոսի նշածը հենց հետազոտվող Արուճն է, կասկած չի հարուցում նախ՝ որպես նստավայր Մամիկոնյան եղբայրների կողմից ժառանգվելու պատճառով, ապա է «Արուճ Աշնակի» բնորոշման պատճառով. Աշնակը բնակավայր է Արուճից ոչ հեռու (այժմ Թալինի շրջանում), պահպանել է իր վաղագույն անունը և հիշատակվում է Արուճի հետ նաև V դարում, որպես գորակայան (տե՛ս ծան. 1): Մյուս Արուճը, ըստ Մանանդյանի (նշվ. աշխ., էջ 26), գտնվում է Կոզովիտ գավառում, Դվին—Բագավան «պողոտայի» վրա: Այս երկու Արուճները, որպես առանձին վանական կենտրոններ, հիշատակվում են նաև «Գիրք թղթոց»-ում (էջ 151):

25 Ա. Тер-Гевондян. Армения и арабский халифат. Ереван, 1977, с. 49—51.

26 Պատմություն Ղևոնդայ մեծ վարդապետի Հայոց. Ս. Պետերբուրգ, 1887, էջ 15:

27 Հովհաննես Դրասխանակերտցի, էջ 91:

28 Ստեփանոսի Տարսեղացույ Ասողկան Պատմություն Տիեզերական. Ս. Պետերբուրգ, 1885, էջ 99: Սամուելի բահանայի Անեցույ Հավաքմունք ի գրոց պատմագրաց. Վաղարշապատ, 1893, էջ 84: Մովսես Կաղանկատվացի. Պատմություն Աղվանից աշխարհի. Երևան, 1963, էջ 153: Կիրակոսի Գանձակեցույ Պատմություն հայոց. Թիֆլիս, 1909, էջ 62:

րի հետ, ջանացել է հնարավորին չափ վերականգնել հայոց կորսված անկախությունը և անգամ արքայական իշխանության ավանդույթները²⁹ իր իշխանությանը փայլ ու շուք հաղորդելով: Դրա ապացույցն են Արուճի Կաթողիկե և Եղվարդի Զորավոր եկեղեցիների, Արուճի պալատի և պաշտպանական համակարգի կառուցումը, Զվանշիր իշխանին նույն Արուճում արքայավայել շուքով ընդունելը³⁰, Գրիգոր Լուսավորչի մասունքները Դարանաղիի Թորդան դուղից Այրարատ՝ Զվարթնոց եկեղեցին տեղափոխելը³¹ և, վերջապես, իր աթոռանիստը Արշակունյաց ոստան Արադածոտնում հիմնելը³², Կարծում ենք պատահականորեն չէ, որ Հովհաննես Դրասխանակերտցին Արուճի պալատը «արքունիք» է անվանել³³:

Գրիգոր Մամիկոնյանի կատարած այս կառուցումները անհամեմատ մեծ չափով են արժանացել հետազոտողների ուշադրությանը, հատկապես 661—66 թթ. կառուցված Ս. Գրիգոր, կամ Կաթողիկե եկեղեցին՝ գմբեթավոր դահլիճ հորինվածքի հայկական նշանավոր հուշարձաններից մեկը: Այս կառույցին անդրադարձել և համակողմանիորեն ուսումնասիրել են Ն. Մառը, Հովսեփ Օրբելին, Թորոս Թորամանյանը, Լ. Դուրնովոն, Ն. Տոկարսկին, Վ. Հարությունյանը, Բ. Առաքելյանը, Ս. Մնացականյանը, Ա. Երեմյանը և այլ մասնագետներ³⁴:

1950-ական թթ. սկզբներին ճարտարապետ Վ. Մ. Հարությունյանի ղեկավարությամբ ձեռնարկվեցին Արուճի պալատական համալիրի պեղումները: Եկեղեցուց մոտ 20 մետր դեպի հարավ, նրան զուգահեռ տեղագրությամբ, բացվել է պալատական դահլիճ, հյուսիսից սյունազարդ սրահով, իսկ հարավից՝ սենյակների շարքով³⁵ շրջափակված: Ինչպես պարզել է Վ. Մ. Հարությունյանը, այս դահլիճն իր հատակագծով, ճարտարապետական մանրամասներով և շափերով (բացի արևելք-արևմուտք ձգվածության չափից), կրկնում է Դվինի VII

29 Գրիգոր Մամիկոնյանի կինը՝ Հեղինեն, հիշատակվում է որպես Հայոց թագուհի (ղշխո), թեև տեղեկություններ չկան, որ ինքը՝ Գրիգոր Մամիկոնյանը կամ թե այլ հայոց իշխաններ կոչվեին արքա կամ թագավոր:

30 Մ ո վ ս ե ս Կ ա դ ա ն կ ա տ վ ա ց ի, էջ 153:

31 Նույն տեղում, էջ 183:

32 Արշակունիների անկումից հետո նրանց տիրույթները, այդ թվում և Արադածոտնը, անցան Սասանյան արքայատոհմին որպես արքունի սեփականություն (Ղ ա զ ա ր Փ ա ր ա յ ե ց ի, էջ 57—59: Մ ո վ ս ե ս Խ ո ր ե ն ա ց ի, էջ 307): Արարական առաջին արշավանքներից հետո, երբ Հայաստանը դուրս եկավ պարսից գերիշխանությունից, Արշակունիների սեփական զավառները, ամենայն հավանականությամբ, մնացին Մամիկոնյաններին որպես ֆեոդալական սեփականություն՝ «դաստակերտ»:

33 Հ ո վ հ ա ն ն ե ս Դ ր ա ս խ ա ն ա կ ե ր տ ց ի, էջ 91:

34 Н. Марр. Армянская церковь в Аруче.—Известия ИАК, вып. 12, СПб., 1904. В. Арутюнян. Указ. соч.; Ն ու յ ն ի՝ VII դ. աշխարհիկ ճարտարապետության մի հուշարձան, էջ 86—91: Н. Токарский. Указ. соч., с. 38—72; Թ. Թորամանյան. նշվ. աշխ., հ. I, էջ 352—353, հ. II, էջ 105 և հտ.: Л. Дурново. Стенная живопись в Аруче.—ЗУОЗ ԳԱ «Տեղեկագիր» (հաս. գիտ.), Երևան, 1952, № 1: И. Орбели. Избранные труды. Ереван, 1963, с. 401—402; Б. Аракелян, В. Арутюнян, С. Мнацаканян. О некоторых вопросах истории армянской архитектуры. Ереван, 1969, с. 54, 98—106. Ա. Երեմյան. VII դարում հայկական հուշարձանների կրած փոփոխությունների մասին.—«Պատմա-բանասիրական հանդես», 1966, № 4, էջ 150—169: Ա. Մանուչարյան. Քննություն Հայաստանի IV—XI դդ. շինարարական վկայագրերի. Երևան, 1977, էջ 100—102: Ա. Շահինյան. Արուճի տաճարի շինարարական արձանագրությունը.—ЗУОЗ ԳԱ «Լրարեր հաս. գիտ.», 1971, № 1: Կ. Մաթևոսյան. Արուճի տաճարի 666 թ. որմնակարը.—ЗУОЗ ԳԱ «Լրարեր հաս. գիտ.», 1981, № 3, էջ 87—88:

35 Սյունազարդ դահլիճին կից սենյակները լրիվ չեն պեղվել:

դարի կաթողիկոսական պալատի գահադաշիճը³⁶։ Եկեղեցուց մոտ 50—60 մետր դեպի հարավ-արևելք պեղումներով բացվել են մի այլ խումբ կառույցներ՝ արդեն նշված միանավ մատուռը (որը Վ. Հարությունյանն իրավամբ համարում է ավելի վաղ կառույց, քան պալատական համալիրը)³⁷ և վաղ միջնադարյան (I V—VI դդ.) քարակոթողների երկու պատվանդաններ³⁸։ Այս մասում պեղվել է նաև ուշագրավ մի դաշիճ, որի կիրառական նշանակությունը չի պարզվել։ Մ. Հարությունյանը համոզիչ կերպով հերքում է այդ կառույցի եկեղեցի լինելը, ինքնագրելով, որ «դաշիճը պատկանում է իշխան Գրիգոր Մամիկոնյանի պալատական կոմպլեքսին և ծառայել է ընդունելության կամ ունկնդրության նպատակների համար»։ Այն համաժամանակյա է սյունազարդ դաշիճին³⁹։

Պատմիչների տեղեկություններից⁴⁰ և մասնագետների ուսումնասիրություններից⁴¹ հայտնի է, որ պալատական համալիրներն ունեն գոթեթե կանոնիկ լուծումներ և կառույցների որոշակի համակարգ՝ թելադրված նրանց գործնական բովանդակությամբ և պալատական նիստուկացրով։ Այդ կառույցներից հայտնի են՝ գահադաշիճը (դաշիճ)՝ հանդիսավոր ընդունելությունների և պետական (կամ եկեղեցական) խորհրդի համար, տաճարը (սեղանատուն)՝ խրախուսանքների և ընդունելության համար, սրահը, որը փաստորեն սպասասրահի դեր է կատարել, պալատական մատուռը կամ եկեղեցին, հրապարակը, որի վրա բացվել են եկեղեցին և պալատը, փողոցը՝ ծածկված, երդիկավոր միջանցք, որը միացրել է պալատի բնակելի և պաշտոնական մասերը, սենյակները (ննջարաններ), տները, որոնք կատարում են պահեստների կամ հատուկ նշանակության սենյակների դեր, ինչպես և պալատի բաղնիքը։ Հայաստանի տարածքում ուսումնասիրված վաղ միջնադարյան պալատներում (Դվինի I V դարի արքունական, Դվինի V և VII դդ., Ավանի և Զվարթնոցի կաթողիկոսական, Արուճի իշխանանիստ) առկա են վերը նշված կառույցները լրիվ կամ մասամբ, բայց որոշակի խմբավորումներով։

Արուճի պալատն իր չափերով, շուքով և ճարտարապետությամբ, ինչպես երևում է, պահպանել է վաղ միջնադարյան աշխարհիկ կառույցների համար մշակված կանոնները⁴²։

Արուճում պեղված համալիրի արևելյան սյունազարդ դաշիճն իր բոլոր տվյալներով համապատասխանում է գահադաշիճի ֆունկցիաներին։ Այս դաշիճին հարավից կից սենյակները կրկնում են Դվինում բացված երկու կաթողիկոսական պալատների հատակաձևը, իսկ հյուսիսից կից սյունազարդ կառույցը, որը բացվում է եկեղեցու և ամենայն հավանականությամբ, պալատամերձ

36 Վ. Հարությունյան. VII դ. աշխարհիկ ճարտարապետության մի նոր հուշարձան, էջ 60—61 և աղյուսակը։ Նույնի՝ Դվինի V—VII դդ. ճարտարապետական հուշարձանները (ըստ 1937—1939 թթ. պեղումների նյութերի). Երևան, 1950, էջ 56—80։

37 Վ. Հարությունյան. VII դ. աշխարհիկ ճարտարապետության մի նոր հուշարձան, էջ 60—61։

38 Արուճի եկեղեցու շրջակայքից հայտնաբերվել և այժմ եկեղեցու ներսում են պահվում վաղ միջնադարյան երկու քառակող կոթողներ, բեկորատված վիճակում։

39 Վ. Հարությունյան. VII դ. աշխարհիկ ճարտարապետության մի նոր հուշարձան, էջ 57—58։ Տե՛ս նաև Марно д'Онофрно. Указ. соч., с. 14.

40 Ազատի ղեկավար. Պատմություն հայոց. Երևան, 1977, էջ 79։ Փավստոս Բուզանդ, էջ 122։


41 Թ. Թորամանյան. Նշվ. աշխ., հ. 1, էջ 355—357։ Վ. Հարությունյան. VII դ. աշխարհիկ ճարտարապետության մի նոր հուշարձան, էջ 62։ Ս. Մնացականյան. Զվարթնոցը և նույնատիպ հուշարձանները. Երևան, 1971, էջ 233—235։ Կ. Ղաֆադարյան. Դվին քաղաքը և նրա պեղումները. հ. 1, Երևան, 1952, էջ 95—117, 124։ Ս. Մնացականյան. Սյունիք. Երևան, 1983, էջ 22—33։

42 Թ. Թորամանյան. Նշվ. աշխ., հ. 1, էջ 62։

հրապարակի կողմը⁴³, հիշեցնում է պատմիչների հիշատակած սրահը⁴⁴։ Նման կառույցները Թ. Թորամանյանը սպասասրահ կամ նախասրահ է համարում. «...երեք կողմեն փակ՝ մեկ կողմեն բացօթյա և կամարակապ սյուների ու վրա հարկածածուկ էր։ Այս ձևի սրահները սովորաբար արքունի հրապարակի որևէ մի կողմին վրա կգտնվեին, ուրկից անցնելով կմտնվեր ապարանքի այս կամ այն բաժանմունքը»⁴⁵։ Դեպի հրապարակ ժողովրդի մուտք ունենալու պարա-



նկ. 1



նկ. 2

զայում բնական է, որ գահադաշիճը պետք է ինչ-որ ձևով բաժանված լինի հրապարակից։ Միևնույն ժամանակ խուլ պատի առկայությունն էլ ցանկալի է հրապարակի ճարտարապետական լուծման տեսակետից, ինչը պետք է որ հանգեցրած լինի գահադաշիճին կից⁴⁶ սյունազարդ սպասասրահի առաջացմանը։

Վաղ միջնադարյան մի շարք պալատներում (Դվին, Ավան, Արուճ) գահադաշիճին կից կա սենյակների շարք՝ տեղադրված հրապարակի հակառակ կողմում, դրանով իսկ ասես շեշտված անմատչելիությամբ⁴⁷։ Դվինում հայտ-

⁴³ Այս մասում հրապարակի առկայությունը պետք է ենթադրել եկեղեցու և պալատի միջև գտնվող սափարակից (առանց VII—XI դդ. կառուցման հետքերի)։ Նման հրապարակ, որը բաց էր ժողովրդի համար և իր վրա էր կրում հոգևոր ու աշխարհիկ կարևորագույն կառույցները, հանդիպում է (Իհարկև ալ մաստարի) դեռ Վաղարշապատում (Աղաթանգեղոս, էջ 80, 108)։ Նման հրապարակներ կան նաև Դվինում և Զվարթնոցում։

⁴⁴ М а р н о д' О н о ф р и о. Указ. соч., с. 14. Քեև հեղինակն այստեղ օգտագործում է «ատրիում» տերմինը, որը ներփակ բակի նշանակություն ունենալով բնավ չի համապատասխանում առկա հուշարձանի սյունազարդ սպասասրահի ֆունկցիային։

⁴⁵ Թ. Թորամանյան. նշվ. աշխ., հ. 1, էջ 356։ Մեկ այլ տեղում Թորամանյանը գրում է, որ սրահը հիմնականում կից է լինում գահադաշիճին ծառայելով որպես սպասասրահ (էջ 357)։

⁴⁶ Ավելի ուշ դարերում նման միտում նկատվում է եկեղեցական ճարտարապետության մեջ, ինչը արտահայտվում է բուն եկեղեցին հրապարակից անջրպետող դավիթի առաջացմամբ։

⁴⁷ Միայն Դվինի VII դարի պալատում գահադաշիճը երկու կողմից է շրջապատված սենյակներով։

նաբերված հնագիտական նյութերը որոշակի ուշինչ չեն հուշում նրանց կիրառության վերաբերյալ⁴⁸։ Կարելի է ենթադրել, որ Արուսի պալատում (ինչպես և մյուս պալատներում) այս սենյակները պալատական կիրառական նշանակություն ունեցող բաժանմունքների հետ այս կամ այն կերպ կապված «տներն» էին, ինչպես «տուն պատմութեանաց», «տուն հանդերձաց», դիվանատուն, դանձարան և այլն, որոնք հիշատակվում են պատմիչների կողմից⁴⁹։

Այս առումով հետաքրքիր է Փավստոս Բուզանդի մի հիշատակությունը՝ Դղեկ մարդպետին սպանելու մասին. «...սակրավոր մարդիկ նրան շրջապատեցին, վեր բարձրացրին և այսպես տարան մինչև թագավորի սեղանատան դուռը։ Երբ թագավորը տեսավ, որ այնտեղ էին տանում՝ ասաց. «ոչ այստեղ, այլ տարեք դրան հանդերձատունը»։ Ապա ասպարակիր զինվորները նրա ձեռները կտրեցին, նրանցքով տարան հանդերձարանը, այսինքն այնտեղ՝ որտեղ թաղավորները թագ էին դնում»⁵⁰։ Այս տեղեկությունից երևում է, որ հանդերձարանը պալատի պաշտոնական մասում էր գտնվում և «փողոցով» (միջանցքով) բաժանված էր սեղանատանից («տաճարից»), որը պետք է զբոսնելու պալատի բնակելի մասում կամ լինեի առանձին (ինչպես Աղթամարի պալատում)⁵¹։ Հնարավոր է ենթադրել, որ արքայական պալատին բնորոշ այս տեղադրությունը կիրառվել նաև արքայական շուքի ձգտող Գրիգոր Մամիկոնյանի «արքունիք»⁵² կոչված պալատում։ Կարելի է ենթադրել, որ վերը նշված կառույցների խումբը կազմում է Արուսի պալատի պաշտոնական հարկաբաժիններից առաջին հայտնաբերվածը։ Ենթադրում ենք, որ հայտնաբերված մյուս կառույցները պետք է խմբավորվեն որպես պալատի ոչ պաշտոնական առօրյայի հետ կապված հարկաբաժիններ, հնարավոր է, պաշտոնական մասից բաժանված «փողոցով» (միջանցք)։ Վերոհիշյալ խմբի մեջ հավանորեն մտել է արդեն նշված միանավ մատուռը, վերածված պալատական եկեղեցու։ Նման օրինակ կա նաև Զվարթնոցի կաթողիկոսական պալատում, որտեղ որպես պալատական եկեղեցի է ծառայել նույնպես IV—VI դդ. մի մատուռ⁵³, այն տարբերությամբ, որ Զվարթնոցում մատուռը ձևափոխվել է և հարմարեցվել կառույցի մեջ, իսկ Արուսում անձեռնմխելի և առանձնացված է մնացել, հավանորեն դիմացը փոքրիկ բակով, քանի որ, ինչպես նշվել է, մատուռին անմիջապես կից, 0,7 և 1,5 մետր հեռավորությամբ, երկու համաժամանակյա կոթողների պատվանդաններ են հայտնաբերվել⁵⁴։

Պալատական համալիրի այս խմբի մյուս կառույցը՝ քառամույթ, հաստ պատերով դահլիճը, հետագա դարերում ամենից ավելի է փոփոխություններ կրել (ավելացել են արևելյան մուտքի կողքի բրգաձև հավելվածները, փակվել է արևմտյան մուտքը, սալարկը տեղ-տեղ կրկնակի է, իսկ հյուսիս-արևելյան անկյունում ջրամբար է կառուցվել) և սա է պատճառներից, մեկը, որ դժվարացրել է նրա նշանակության պարզաբանումը։ Մյուս պատճառն այն է, որ դուզահաններ չունի միջնադարյան Հայաստանի հայտնի կառույցներում։ Դահլիճանման այս շինությունն ունի 18,7×10,7 մ ներքին չափեր (արտաքին չափերը անհնար է որոշել՝ ուշ հավելվածների պատճառով), երեք մուտքը՝ արևելքից, արևմուտքից և հյուսիսից։ Հյուսիսայինը, որն ի սկզբանե ամենանեղն է եղել, հետագա վերակառուցումների ժամանակ վերածվել է լուսամուտի, արևմտյան մուտքը լրիվ փակվել է, իսկ արևելյանը, որն ունեցել է 210 սմ լայնություն, նեղացվել է՝ ձևափոխված կառույցի պաշտպանական ֆունկցիային համապատասխան։

48 Կ. Ղաֆադարյան. Դվին քաղաքը և նրա պեղումները, էջ 120։

49 Փավստոս Բուզանդ, էջ 249։

50 Նույն տեղում։

51 Թ. Թորամանյան. Նշվ. աշխ., հ. 1, էջ 356։

52 Մովսես Կաղանկատվացի, էջ 153։

53 Թ. Թորամանյան. Նշվ. աշխ., հ. 1, էջ 358, հ. 2, էջ 23։ Ս. Մնացականյան.

Զվարթնոցը և նույնատիպ հուշարձանները, էջ 232։

54 Վ. Հարությունյան. VII դ. աշխարհիկ ճարտարապետության մի նոր հուշարձան, էջ 59։

վ. Հարությունյանը բացառում է սրա գմբեթավոր կառուցվածք լինելը և համոզիչ ապացույցներ է բերում դահլիճի թաղածածկ լինելու մասին⁵⁵։ Լուսավորումը և նթադրվում է վերևից, քանի որ բավական մեծ բարձրությամբ պահպանված պատերին լուսամուտներ չկան։

Շինությունը կանգնած է երկաստիճան գետնախարիսխի վրա, որը շեշտում է նրա մեկուսացվածությունը։ Հնադարավոր է ենթադրել, որ սա սկզբնաղբյուրներում այնքան հաճախ հիշատակվող պալատական համալիրի սեղանատունը («տաճար») լինի։ Այս կառույցում առկա են «տաճարին» բնորոշ որոշ առանձնահատկություններ. միջավայրը՝ դահլիճը գտնվում է պալատական համալիրի ոչ պաշտոնական մասում, սակայն որոշակիորեն առանձնացված է և հանդիսավոր, ինչը կարող էր թելադրված լինել թե՛ ամենօրյա գործածության և թե՛ հանդիսավոր արարողություններին, ճաշկերույթներին ծառայելու հանգամանքով. հատարապետական առանձնահատկությունները՝ դահլիճի թաղակապ ծածկը, պատերի որմնամուկթերով առաջացող խորշերը, բազմաթիվ դռները (որոնցից երկուսը՝ արևելյանն ու արևմտյանը, հավանորեն երկփեղկ)⁵⁶, շինվածքի մոնումենտալությունը և, միևնույն ժամանակ, ներքուստ ստեղծվող բավական ինտիմ միջավայրը (որը կարող էր լրացվել լուսավորման էֆեկտներով և ներքին հարդարանքի տարրերով) և, վերջապես, դիւբլ եկեղեցուց և հրապարակից (որպես մարդաշատ վայրեր) բավական հեռու և այլ կառույցներով փակված լինելը, ինչը, սակայն, չի խանգարում դեպի արևելք և հյուսիս-արևելք բաց տեսարան ունենալուն (բուն ավանը դեպի այս կողմ տարածված էր)։

Կարելի է ենթադրել, որ Արուճի պալատական համալիրի որոշ կառույցներ, թե՛ պաշտոնական և թե՛ ոչ պաշտոնական (բնակելի) հարկաբաժիններից, դեռևս հողով են ծածկված⁵⁷։

Արուճի եկեղեցուց և պալատական համալիրից մոտ 80—100 մետր դեպի հյուսիս, հյուսիս-արևելք, Երևան—Լենինական հին ավտոճանապարհի մոտ, 1983 թ. կատարվող հողային աշխատանքների ընթացքում բացվեց ջարդված քարե (տուֆ) մի սարկոֆագ, եռանկյունաձև հատվածքի ծածկասալով (տևս նկ. 1)։ Կատարված հետախուզական պեղումները⁵⁸ պարզեցին, որ այս տարածքում միջնադարյան գերեզմանոց է եղել։ Պեղվեցին ևս մեկ քարե ամբողջական սարկոֆագ, եռանկյունաձև հատվածքի ծածկասալով (նկ. 2) և մեկ հիմնահողային թաղում, ծածկված հարթ ծածկասալով։ Բոլոր դեպքերում հնագիտական նյութը բացակայում էր։ Ուղղվածությունը արևելք-արևմուտք է (դուխը դեպի արևմուտք)։ Կմախքը մեջքի վրա է պառկած, ձգված վիճակում, ձևերը կրծքին խաչած։ Գրունտային ջրերից թաղվածների ոսկորները քայքայված էին։ Սարկոֆագները և ծածկասալերը զանգվածեղ և, սակայն կատարված քարի բարձրորակ մշակումով։ Սարկոֆագներից մեկի փորվածքը անտրոպոմորֆ է, մյուսը՝ ուղղանկյուն։ Նյութը, ձևը, մշակումը, կողմնորոշումը, թաղման ձևը, ինչպես նաև Հայաստանում հայտնի դուզահեռները (Ջրվեժ⁵⁹, Լմպատավանք)⁶⁰ թույլ են տալիս սարկոֆագները և ողջ դերեզմանոցը թվագրել վաղ միջնադարով (IV—VII դդ.)։ Գերեզմանոցի թվագրմամբ մասամբ պարզվում է Արուճ բնակավայրի հյուսիսային սահմանագիծը ուսումնասիրվող ժամանակաշրջանում։

⁵⁵ Նույն տեղում, էջ 58։

⁵⁶ Թ. Թորամանյան, Նշվ աշխ., հ. 1, էջ 353—354։ Հեղինակը նշում է նման դռների առկայությունը հայկական միջնադարյան պալատներում։

⁵⁷ Վ. Հարությունյան, VII դ. աշխարհիկ ճարտարապետության մի նոր հուշարձան, էջ 57։

⁵⁸ 1983 թ. հետո Արուճի պեղումները կատարվում են ՀՍՀ ԳԱ հնագիտության և ազգագրության ինստիտուտի կողմից։

⁵⁹ Ըստ Ջրվեժում համանման սարկոֆագներ պեղած Ա. Ժամկոչյանի բանավոր վկայության։

⁶⁰ Նման սարկոֆագներ՝ անտրոպոմորֆ հանվածքով, հայտնաբերվել են Լմպատավանքի (Արթիկի շրջան, VI դար) հիմքերի մոտ, եկեղեցու մաքրման աշխատանքների ընթացքում։

РАННЕСРЕДНЕВЕКОВЫЕ ПАМЯТНИКИ АРУЧА

Б. Л. САДОЯН

Резюме

На основе сопоставительного археологического, архитектурного и источниковедческого анализа в статье рассматривается вопрос о времени строительства недавно раскопанного крепостного сооружения в Аруче. Мы приходим к выводу, что это сооружение было возведено в III—IV вв. Аршакидами и служило зимними квартирами царским войскам. В статье также делается попытка определить функциональное назначение некоторых строений аручского дворцового комплекса VII в., раскопанного в 50-х гг. В. М. Арутюняном.